

Majlis Watikah Pelantikan Pengawas

Oleh Haziq Naquiddin Md Suhaimi (2A3),
Muhammad Adlan Abdul Razak (2A2), Mohd Afiq
Adham Zulkipli (2A2) dan Muhd Daniel Asyraf Azizan
(1A6)



TN. HJ. ABDULLAH MOHD ALI menyampaikan watikah pelantikan kepada pengawas sekolah.

SMK Batu 5, 2 Februari 2014 – Majlis Watikah Pelantikan Pengawas Sekolah, Pengawas Asrama, Pengawas Pusat Sumber, Ketua Tingkatan dan Penolong Ketua Tingkatan telah dijalankan dengan jayanya bertempat di Dewan Seri Delima.

Majlis ini diserikan dengan kehadiran Tn. Hj. Abdullah Mohd Ali, Pengetua SMK Seri Badong. Beliau telah berkongsi maklumat tentang cara-cara menjadi pemimpin yang berwibawa dan bertanggungjawab menjalankan tugas yang diamanahkan oleh guru-guru.

Setelah upacara penyerahan watikah pelantikan, bacaan ikrar telah diadakan. Saudara Muhammad Muhaimin bin Basri, Ketua Pengawas Sekolah telah memimpin bacaan ikrar pengawas dengan penuh bersemangat. Majlis yang bermula pada pukul 7.40 pagi ini berakhir pada pukul 8.40 pagi.

Kejohanan Ping Pong MSSK (D) Kuala Muda Yan

Oleh Lim Ann Tian (4 Sains)

Pada 13 Februari dan 14 Februari, Kejohanan Ping Pong MSSK (D) Kuala Muda Yan diadakan di SMK Batu 5, Jalan Jeniang yang terpilih sebagai tuan rumah. Kejohanan ini berlangsung pada pukul 8.00 pagi hingga 5.30 petang.

Acara-acara yang diadakan ialah perseorangan lelaki dan perseorangan perempuan bawah 18 tahun,

15 tahun dan 12 tahun. Sebanyak 269 orang peserta menyertai kejohanan ini. SMK Batu 5 telah menghantar sebanyak 11 orang peserta mengambil bahagian dalam pelbagai acara.

2 orang pemain SMK Batu 5 berjaya memenangi acara perseorangan lelaki bawah 18 tahun. Antaranya ialah Lau Chun Hoe (3A5) yang mendapat johan dan Lim Yong Jian (5K3) yang mendapat tempat ketiga. Sementara itu, Lee Wen Jie (3A2) pula menjadi johan dalam perseorangan perempuan bawah 15 tahun.

Mereka terpilih sebagai wakil Daerah Kuala Muda Yan pada Kejohanan MSS Kedah yang akan dilangsungkan di SMK Pendang pada 27 Februari hingga 1 Mac.

Enam Pelajar Tingkatan 1 Sesak Nafas

Akibat Kebocoran Gas Ammonia

Oleh Izzah Abd Aziz (5 Sains)



ANGGOTA ST. JOHN AMBULANCE GURUN memberikan rawatan kecemasan kepada pelajar yang mengalami sesak nafas.

SMK Batu 5, 27 Februari – Enam orang pelajar Tingkatan 1 mengalami sesak nafas manakala 2 daripada pelajar tersebut telah dikejarkan ke hospital akibat terhidu gas ammonia yang bocor dari kilang Petronas.

Dalam kejadian pada pukul 9.35 pagi tersebut, keadaan menjadi agak kecoh apabila loceng kecemasan dibunyikan. Para pelajar bergegas ke tempat berkumpul di padang sekolah.

Pasukan Bomba Sukarela Padang Lembu dan ambulans dari St. John Ambulance Gurun Jaya tiba setelah menerima panggilan kecemasan.

Bomba Sukarela Padang lembu bertindak pantas dengan membuat semburan “tirai air” (*water curtain*) di tempat pelajar berkumpul. Petugas St. John

Ambulance pula memberikan rawatan kecemasan kepada para pelajar yang mengalami sesak nafas.

Mujurlah kejadian tersebut hanyalah latihan kecemasan yang dikendalikan oleh pihak kilang Petronas Fertilizer sebagai persediaan sekiranya berlaku kebocoran bahan kimia dari kilang tersebut.

Latihan kecemasan kebocoran bahan kimia ini dimulakan dengan ceramah oleh pegawai petronas. Selepas ceramah, latihan kecemasan kebakaran dijalankan. Latihan ini berakhir pada pukul 10.20 pagi.

Kejohanan Balapan dan Padang MSSK (D) Kuala Muda/Yan 2014

Oleh **Muhaimin Basri (5 Sains)**



PESERTA PERBARISAN bersiap sedia untuk memulakan perbarisan lintas hormat.

Kejohanan Balapan dan Padang MSSK (D) Kuala Muda/Yan Kali ke-13 Tahun 2014 telah berlangsung dengan jayanya di SMK Tunku Ismail dari 26 Februari hingga 1 Mac yang lalu.

SMK Batu 5 telah turut memeriahkan kejohanan ini dengan menghantar peserta kontinjen perbarisan yang terdiri daripada 32 peserta yang diketuai oleh Muhaimin Basri dari Tingkatan 5 Sains.

Peserta olahraga SMK Batu 5 telah berjaya merangkul 1 pingat emas, 3 perak dan 1 gangsa. Pingat emas dimenangi oleh Tuan Puteri Maisara Tuan Razmi (3A3) dalam acara lontar peluru. 3 pingat perak dimenangi oleh Muhamad Zul Helmi Azman (5K1) dalam acara lompat jauh dan lompat kijang serta Nur Fattin Nabilah (3A3) dalam acara 100 meter lari berpagar. 1 pingat gangsa telah disumbangkan oleh Muhamad Zul Helmi Azman (5K1) dalam acara 100 meter.

SMK Batu 5 Unggul!

Oleh **Amir Firdaus Ibrahim (2A2), Naruddin Shah (2A2), Muhammad Aiman Mohd Azan (1A5)** dan **Wan Mohd Syazmi Mohd Shukri (1A3)**

SMK Batu 5, 23 Februari – Pasukan bola sepak SMK Batu 5 telah membuktikan keunggulan apabila telah berjaya menewaskan SMK Seri Badong dalam kedua-dua kategori.

Bagi kategori bawah 15 tahun, pasukan sekolah kita telah berjaya menewaskan pasukan SMK Seri Badong dengan jaringan 4 – 0. Pada separuh masa pertama, Muhammad Al-Danial Mazlan (3A2) menjaringkan 2 gol dan Muhammad Muhaimin Abdul Hamid, 1 gol. Seterusnya, pada separuh masa kedua, 1 gol telah disempurnakan oleh Izzul Rafiq Dzul Azman (3A4).

Bagi kategori 18 tahun, pasukan bola sepak kita telah berjaya menumpaskan pasukan SMK Seri Badong dengan 6 gol berbalas 2. Pada separuh masa pertama, pasukan SMK Batu 5 mengawal permainan dengan baik dengan memperoleh 5 gol. Shahrul Nafis Khosim (5K2) berjaya melakukan jaringan hatrik. Muhammad Aiman Shuhari pula telah berjaya menyumbat 2 gol.

Pada separuh masa kedua, Mohd Hafizzi Hashim (5K2) berjaya menjaringkan 1 gol. Tahniah diucapkan kepada pasukan dan guru-guru bola sepak sekolah.

Majlis Pelancaran Semarak NILAM dan Bulan PPDa Peringkat Sekolah

Oleh **Jivayashine a/p Sures Rao (4 Sains)**

SMK Batu 5, 23 Februari – Majlis Pelancaran Semarak NILAM dan Bulan PPDa Peringkat Sekolah Tahun 2014 telah berlangsung dengan meriah di Dewan Seri Delima.

Majlis yang dijalankan dijalankan secara serentak ini antaranya bertujuan untuk mewujudkan perasaan cinta akan ilmu melalui amalan membaca dan perasaan benci akan rokok serta dadah.

Majlis yang bermula pada pukul 7.30 pagi ini dirasmikan oleh Puan Rosdiah Shuid, Penolong Kanan Pentadbiran. Majlis ini diserikan lagi dengan tayangan slaid dan nyanyian lagu PPDa dan lagu NILAM. Majlis ini berakhir pada pukul 8.35 pagi.

Warta Delima diterbitkan sebulan sekali. Para pelajar dialu-alukan menyumbang apa-apa berita yang berlaku di sekolah.

Berita boleh ditulis dalam bahasa Melayu atau bahasa Inggeris. Hantarkan berita anda sama ada bertulis tangan atau e-melkan kepada Guru Cemerlang Bahasa Melayu, En. Zamri Salleh:

zamrisalleh.smkbt5@gmail.com